



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Rankireddy aser Shetty nati  
Indonesia Open kokogo

Ukraine nung rara ya  
anentsüla: Ramaphosa



VOL. XX NO. 246 (ADOK 246)

DIMAPUR TENTONÜ (MONDAY)

AAMI (JUNE) 19 2023

₹ 5.00

## Nagaland-i 4th G20 EdWG meeting nung adener



Minister of State for Education Annpurna Devi den ketdangsürtemi Nagaland exhibition stall semdangba angur.

**Kohima, June 18, 2023 (TYO):** Ministry of Education kübok National Conference for Foundational Literacy & Numeracy sentong nung Nagaland School Education Department-ia shilem agir.

Iba sentong ya June 17 nungi 18 tashi Savitribai Phule, Pune University nung ayongzüka agir aser iba ya 4th G20 Education Working Group (EdWG) Meeting indang shilem ka lir.

June 19 nü Foundational Literacy & Numeracy indang shisatokden ka agitsü aser iba nung G20 linüktem nungi züngsemtem aden.

June 17 nü Minister of State for Education Annpurna Devi-i iba sentong tenzüksü.

Sentong nung IIM, NIAS, CSTT, MOE, NIEPA, CBSE aser CBC, GoI nungi subject experts-i onük balala lemsatapa liasü aser state balalai Foundational Literacy & Numeracy indang presentations sayu.

Sentong nungsa School Education Maharashtra Minister Deepak Kesarkar, Higher & Technical Education Maharashtra Minister Chandra Patil, Educationist, Actor and film maker Dr. Chandraprakash Dwivedi aser Vice Chancellor SPPU Prof. Suresh Gosavi nungeria o jembü.

Linük nung school education indang system tajungba küma Foundational Literacy & Numeracy akangshitsü nükjidong nung iba mungdang amonger.

Mungdang lapokba sentong nung Secretary, Ministry of Education Sanjay Kumar-i tesentepertem pelaa agizük.

Iba sentong nung Commissioner & Secretary School Education & SCERT Kevileno Angami aser State Mission Director Samagra Shiksha, Nagaland Tamsunaro Aier nati anir Nagaland School Education department-i shilem agir.

## 'Mann Ki Baat' mapang Manipur nung radio raksaa lungkak ait

**Imphal, June 18, 2023 (Agencies):** Prime Minister Narendra Modi-i Manipur nung tensa atema ola madokba atema nübertemi tejashi sayuogo.

June 18 nü Prime Minister Narendra Modi indang "Mann Ki Baat" sentong agidang Manipur kübok tesem aika nung nübertemi radio raksaa lungkak ait.

Parnokisa Prime Minister Modi aser Manipur sorkar anema yimyim ayima lungkak ait.

Deobarnü PM Modi indang "Mann Ki Baat" nung pai Manipur nung mepetmesü adoka aliba indang olen ka danga mejembü.

Külen, Congress party national president Mallikarjun Kharge-ia PM Modi aitsüogo.

"Nür (PM Narendra Modi) 'Mann Ki Baat' nung tamasa 'Manipur Ki Baat' adentsüla saka maden. Arrtsülen aliba state nung tensa kanga majung lir" ta Congress president Kharge-i ashi.

"Nai (Modi) olen ka danga mejembü. Nai senden ka danga ayonga mamen. Nai party ajak külem telok den ano majurutep" ta paisa metetdaksü.

"Manipur arondang Centre nung Modi'er sorkar mejanga oa lir. Nür sorkari Manipur ya India nung shilem ka ta magizüker ama repranger aser iba ya onoki magizüker" ta Kharge-isa ashi.

'Mann Ki Baat' ano ka agiogo saka Manipur atemabo 'Maun' (silence) ta Congress lennir tejen aser Rajya Sabha MP Jairam Ramesh-ia metetdaksü.

"India-i disaster management junga inyakba atema PM-i pa sasa tenüngsangogo. Süra Manipur nung meimchirtemi adokdaksüba humanitarian disaster atema koda" ta Ramesh-i asüngdang.

"Tang tashi pa (Modi) nungi yimjung temepishiba mali. PM-CARES Fund lir saka PM-i Manipur atema mebilemsür" ta paisa ashi.

## ANTA office raksatsüba atema Jun 21 nü senden amentsü

**Kohima, June 18, 2023 (TYO):** All Nagaland Taxi Association Headquarters Kohima indang office raksatsüba atema Bodbarnü ANTA indang districts units ajak senden ka amentsü.

Deobarnü ANTA rongdak sanen luden senden amendang June 21 nü Kohima nung district units ajak rongdak senden ka amentsü lemtet.

Nisung kari ANTA general secretary dak prangpong agi tuitter merenshiba aser office raksatsüba atema parnok i iba senden ayonger.

Iba tatalokba atema North Police Station Kohima nung FIR benokba sülen police-i bushisüngdang tenzükogo saka ANTA general body senden nung iba onük atema lemtet ka agitsü ta osang angazüker.

ANTA Hq Kohima-ia parnok Head Office raksatsüba khukhua aitsüba metetdaksüogo.

ANTA Hq ajanga Nagaland nung Taxi Drivers aser kibur ajak ajungtsü atema inyaksangshir aser office nung General Secretary ANTA Hq dak prangpong agi tuitter merenshiba aser office raksatsüba ya magizüker ta ANTA Hq Kohima-i ashi.

Mejangjatetba nisungtemi ozü ketdangpur taküm lendongi aitsüsa merenshiba ya lapi mapa ka lir aser magizüker. Iba atema ozüng amertemi tapet mapa inyaksü ta ANTA Hqs-i sangdong ka nung ashi.

Loktiliba nungi ibala mapa tamajung agientsü asoshi ANTA-i akokba tashi ozüng amertem den yariteptsü ta parnokisa ashi.

Maneni, Nagaland Two Wheeler Taxi Association aser Business Association of Nagas (BAN) teloktemi sangdong balala ajanga iba tatalokba aitsüogo.

"Tangar hao ta melii yamai raksatsüba ajanga item nisungtemi loktiliba akhüm

metsübuba sayur. NTWTA-i iba inyakyim aitsür aser magizüker" ta NTWTA president Keneisalie Belho-i ashi.

ANTA indang office raksatsüba khukhua aitsür ta Business Association of Nagas (BAN)-ia sangdong ka nung metetdaksüogo.

Iba inyakyim ajanga nisung kari pei nija ajangzüksü asoshi mapa tamajung inyaksü metsübuba sayur. Onoki ibala tesempatsü mapa aitsür aser kodanga magizüksü ta nenshir. Nisung/telok ka dak inyakba ya nisung/telok ajak dak inyakba ama züngshir aser nisung kari asentzü sena meranga inyakba nisung kar nem auyazüka magidaksütsü, ta BAN-i ashi.

Ozüng amertemi iba mapa inyakertem tangsa pua merenshitsu akhanger. Ozüng mapa shitak inyak nung dang tarutsü nung ibala inyakyim nungi jenbua alitsü, ta BAN-isa metetdaksü.

## Manipur nung 'Unau Committee for Separate Administration' tenteter



June 17 nü London kübok Westminster nung Manipur nungi lisapur telok kati ield Marshal William Slim indang kürakyanglu jakdang lungkak aitba angur. Parnoki Manipur nung lisapurtem anema inyakba aitsü aser President's Rule alitsü takhangba agütsü.

**Imphal, June 18, 2023 (Agencies):** Manipur nung lisapur lennirtemi "Unau Committee for Separate Administration" ta ser külem sabang ka tentetogo.

Manipur kübok Pherzawl, Tengenpual, Kangpokpi, Chandel aser Lamka district tem nung lisapur lennirtem den MLA 10 külem senden ka amendang iba lemtet agi.

Senden nung adenertemi tenüng tasen ajatsü mulunga agizük aser Zo lisapurtem taginüba aser tejangraba atema inyaksü bangjemtep.

Unau Committee-i Prime Minister Narendra Modi den ajuruteptsü aser parnok tebilebatem indang memorandum ka agütsütsü sentong lir.

Manipur nung Kuki nung MLA 10-i Union Home Minister Amit Shah aser Assam Chief

Minister Himanta Biswa Sarma na den ajurutepba sülen teimla tulu lir.

ITLF-i CM Biren dang asüngdang:

Külen, Prime Minister Narendra Modi-i Manipur asoshi ola kecha madokba atema tejashia nung Indigenous Tribal Leaders' Forum (ITLF)-i Chief Minister N Biren Singh aser Home Minister Amit Shah na dang mapa inyaksü takhangba agütsüogo.

ITLF-i Manipur nung President's Rule alitsü akhangba den külemi Manipur CM'er kinungertemi ozüng alema poppy lu ayimba, mozü shibelenba aser Arambai Tenggol züngsemtemi prangpong tajung amshiba indang tasüngdangba aika asüngdangogo.

Taoba additional Superintendent of Police Brinda Thongnaojam-i Chief Minister nem osang agütsüba nung

Manipur nung yimtenren lennirtem aser drug lords tenüng agütsüba yimjak nung metetdakjang ta ITLF-isa takhangba agütsür.

Parnokisa Thoubal district nung ozüng alema poppy lu ayimba indang shia lir. Thoubal district ya drug manufacturing facility tongti tesem ka lir.

ITLF-isa sorkar dang lendong atalokba sülen FIR 3000 shi benoka aliba nung Arambai Tenggol züngsemtem aser parnok tanishir Kouroungaba Khuman anema FIR ka danga mebenokba atema asüngdangogo.

Indigenous Tribal Leaders Forum (ITLF)-isa parnok indang Twitter official handle shibangtsüba aitsüogo.

Iba sabang ajanga lisapur teloktem den Zo nung indang temeten osang prokshia liasü ta parnok i ashi.

## Imli Sunep indang painting sen lakh ka agi ayok



Artist Imli Sunep den pai yangluba "Rays of Hope" noksa yangi angur.

**Dimapur, Aami/June 18 (TYO):** PwD Startup Competition nung tematiba jenjang ngutetsang Imli Sunep indang painting ka online auction sen sen 1,05,000 agi ayok, koba Honibar nikongdang 4:30 ako nung shibanga liasü.

Sunepba indang painting "Rays of Hope" ya pa indang danga noksa ama pa tebang amshia yanglu.

Iba painting nung yokzükba sen ya shilem 90 pa nem agütsütsü aser shilem ter ya PwDs nem agütsütsü.

Social media nung iba noksa ayokba maparen ya YouthNet Incubation Centre nung mentor Yanpfuo Kikon-i ketdangsüa liasü.

Sunep Art tentetsang Sunepba ya PwD Startup Competition indang winner sangdonga liasü. Iba sentong ya Startup Nagaland Policy 2019 kübok lir, koba June 16, 2023 nü YouthNet Incubation Centre,

PwD Coworking Space, YouthNet Office, Dimapur nung agia liasü.

PwD entrepreneurs ajungmesotsü aser tashi agüja parnok sempet benjongsüsa ecosystem adokdaksütsü aser aintsü asoshi maongka agütsütsü nükjidong nung iba sentong ya ayongzükba liasü.

Iba sentong nung nisung tenet-i shilem agi aser parnoki parnok indang business lemsatep aser shilem agir ajak nem seed money agütsütsü.

Imli Sunep nem sen 60,000 agütsütsü aser runner-up Grance Marilyn aser Vilika (GMV Group tenteter) nem sen 40,000 agütsütsü.

Consolation Prize nisung shia (par pongu) sen 20,000 angutsü aser par pongu ya Inaholi Zhimomi of Crafty Crochet; Rokovituo Luho of Roko's Hair Cutting Corner, V Kera Fatima of Adile's Care Product; Ngaugongbe of Ngaugongbe

Piggery aser Kamo Movi of Movi Crafts alitsü.

Temang nung matamabensai aliba nisungtem entrepreneurship tejangraba lenmang shidak nung anitetsü asoshi PwD Startup Program ya kanga tongtipang lir, aser iba yagu pei sasa inyaktetba business sayutsü asoshi teyari sapang agütsür.

YouthNet ajanga North East India nung mezüngbuba Startup Incubation Program for Persons with Disabilities ya Office of the State Commissioner for Persons with Disabilities, aser Startup Nagaland, Department of Industries and Commerce den lungjemer December 12, 2022 nü YouthNet Dimapur Office nung YouthNet Incubation Centre program indang shilem ka ama tenzükba liasü, kong PwD nungi entrepreneurs asoshi tesem temeja ka lapoktsü.

YouthNet Incubation Centre yagi entrepreneurs atema ki o jen, networking aser business services agütsür.

PwD Startup Competition nung tetendanger tem ya T Jamir, General Manager, Nagaland Industrial Development Corporation Ltd.; Vivito, Managing Director, Nagaland Coffee; Nune Chase, Director, YouthNet; Yanpvuo Kikon, Founder Kiconic Tech and Kley Enterprise; Ashe H Kiba, Program Coordinator, Office of the SCPD aser Nukuzo Phesao, Proprietor Warehouse103, Nature Fuel India, Pristine Foods Nagaland nungertem liasü.

## DGC nung State Level Workshop ka ayongzükba agiogo



**Dimapur, Aami/June 18 (TYO):** Dimapur Government College (DGC) kübok Department of Commerce & IQAC-i ayongzükba June 16 nü State Level Workshop ka ayongzükba agiogo.

Iba workshop ya "National Higher Education Qualification Framework under NEP-2020 & Four Year Undergraduate Programme under Nagaland University" omen nung ajemdaker Seminar Hall, DGC nung agiogo. Workshop nung nisung 55-i shilem agi aser shilem agirtem ya state kübok Commerce Colleges 13 nungi liasü.

Mezüngbuba session ya Assoc. Professor aser Head, Department of Commerce Biswajit Sarkar lenisüba nung agi aser Sanjay Sharma, Principal, Dimapur Government College

(DGC)-ia o tatsüka jembia liasü. Workshop nung shisalen agütsür Dr. Gautam Patikar, Professor and Head, Department of Commerce, Nagaland University liasü aser pai "National Higher Education Qualification Framework under NEP-2020" onük nung ajemdaker tangazükba agütsü.

NEP-2020 ya tetsü tebou mapang tangazükba yimya aser value tem meyokteper modern education system ka yanglutsü meranger ta shia pai, Education System melenshitsu nungdakba kulitem aser NEP-2020 nükjidong lemsatepa liasü.

Dr. Gautam-i ashiba agi, NEP-2020 aser iba sentong indang motto 3Es (Educate, Encourage and Enlighten) aser 4 Basic Principles (Equity, Access, Quality & Accountability) yagi kaketshirtem nem robust,

holistic, dynamic, flexible aser universal learning outcome agütsütsü meranger. NEP-2020 kübok tesayurtem ya kaketshirtem atema mentor ama inyaksangshitsüla aser Logical Thinking, Self-motivation, Information Gathering & Research aser Organisational Panning amala skill tem agütsütsü nükjidong lir, ta pai ashi.

Mezüngbuba session ya Dr. Gautam-i, NEP-2020 temulungji "Multidiscipline" ta shir tembang.

Tanabuba session ya Imkongmenla Longkumer, Asst. Professor, DGC lenisüba nung agi aser shisalen agütsürji Professor PK Deka aser Dr. Ratan Kaurintaon na liasü. Iba session ya "Four Year Undergraduate Programme under Nagaland University" omen nung ajemdaker agia liasü.

Iba session nung NU kübok FYUP indang structure tem sayu aser iba den tang benoka aliba paper tem indang metetdaksü, koba melenshitsu akok.

Session tembangba sülen workshop nung shilem agirtemi tasüngdangba balala asüngdang aser shisalen agütsürtemi parnoki mangatetbatem langzúa liasü.

Maneni shisalen agütsürtemisa metongshitsu atema University dangi abentsü asoshi onük balala mangaoka yua liasü.

Iba workshop ya Jimokali Zhakheto Zhimomi, Secretary, IQAC-i tepala o jembir tembanga liasü. Sentong nung Zuchobeni E Lotha, Asst. Professor, Commerce, DGC Rapporteur liasü.

## Tapi agi tai metongloksütsüla, nungdakba kuli kaket shidak lir: RD Director

**Dimapur, Aami/June 18 (TYO):** Department of Rural Development aser yangi ketdangsür temi senotsü meshidak amshi ta NTPRDAO ajanga tai tonglokja print aser electronic media balala nung adoktsüba atema, Director, Directorate of Rural Development, Nagaland, Azenuo Pienyü-i sangdong ka nung jangjashija/metongshija liasü.

PMAY-G koba dang Rural Housing Scheme ta ajar, ibai Fund Transfer Orders (FTOs) generate süa Public Fund Management System (PFMS) ajanga online module of transferring fund nung ajemdaker inyakba mapa ka lir.

PFMS ya web nung amendaka aliba online software application ka lir, koba Government of India indang Plan schemes ajunga kübok senotsü agütsüba tsüngsü aputsü aser sentongtem mapa kuma inyakba mapang shidak nung osang agütsütsü nükjidong nung Controller General of Accounts (CGA), Department of Expenditure, Ministry of Finance, Government of India ajanga yanglua amshir, ta sangdong ajanga ashi.

Iba inyakyim ya online cashless transfer system ka lir, kong Ministry of Finance, Government of India ajanga State Nodal Account (SNA) nungi indang-indanga beneficiary account-i senotsü yokba azüoker.

State nung banking coverage peria maliba mechi teyari agir nem ki o jen yanglutsü osettsüset tem agütsütsü atema Department-i vendors nem nungloksü.

Iba inyakyim ya amshitsu asoshi Ministry of Rural Development, Government of India ajanga May 23, 2017 nü agizük. Yamaji PMAY-G kübok teyari angur nem ki o jen yanglutsü osettsüset agütsütsü asoshi Vendors nem nungloksü, kong senotsü ya Cheque ajanga masü saka PFMS ajanga vendor indang account-i electronic transfer asür, ta Director, RD ajanga ashi.

Jangjatsü atema PMAY-G state Nodal Account indang bank statements tem lir. National Socio-Economic Caste Census (SECC) data of 2011 nung ajemdaker PMAY-G kübok yimtsüng sasep tashi teyari angurtem ya State Department of Rural Development ajanga masü Ministry of Rural Development (MORD), Government of India ajanga shimer, ta sangdong ajanga ashi.

Government of India ajanga agütsüba auto-generated list dak alaka SECC kübok state-i teyari agütsütsüpur shimtsü mela mali.

Sen 74,73,07,700 meshidaki amshio go ta tai tonglokja aliba nungi FY 2016-17 atema sen 57,33,11,700 angu aser iba sen ya temalen shia aliba yimya nung

amshio go, ta ashi.

PMAY-G ki yanglutsü atema teyari agirtem nem vendors ajanga ki o jen yangluba osettsüset agütsügo, anungji RTI telangzüba nung teyari agir nem senotsü magütsü ta ashi, kechiaser osettsüset dang agütsü, ta sangdong ajanga ashi.

Anungji Department-i iba sen meshidaki amshi ta aitsüba ya tejangja masü. Tanungba sen 17,39,96,000 ya FY 2019-20 indang target atema mezüng Installment indang mezüng shilem ama angu, koba Department ajanga tang tagütsüdak lir.

Sen 17,39,96,000 nungi SECC beneficiaries yaritsü atema sen 12,54,50,000 amshio go, koba PFMS ajanga Bendors indang account nung tanabuba Installment sen 88,000 yokogo aser mezüngbuba aser tasembuba installments sen 22,000 aser sen 20,000 ya electronic ajanga teyari agir indang account nung inoktsügo, ta sangdong ajanga ashi.

Ministry of Finance, Government of India totuyuba nung iba sentong mapa kuma inyaksü atema state-i DBT mode amshi tenzükogo.

Tang shia aluba utilization indang nungdakba kuli kaket aser bank statements ajak office nung lir, anungji teyari agirtem nem lemsütsüba ama sen shidak magütsüi mashilen amshi ta jembitsü madoker, ta ashi.

State nung banking coverage shidak meliaka teyari agirtem bank account lapoktsü aser Aadhaar ajanga agütsü meranga Department-i inyaker. Village Councils aser Village Development Boards ajanga Department ketdangsür temi teyari angurtem den yaritepa arur. Spot nung oa account lapoka Aadhaar card tem agizüktsü atema bankers aser nungdakba ketdangsürtem yimdak yimtsüngi anir ogo.

Tang state nung PMAY-G ya noklang nung noklang shilem Direct Benegit Transfer (DBT) ajanga inyaker, kong sen ya State Nodal Account nungi electronic agi PFMS ajanga beneficiaries indang account-i indang indanga installments asem nung transfer sütsür, ta ashi.

Nungdakba documents aser bank statements ajak yua lir aser Department-i scheme tem tajungtiba nung mapa kuma inyaksü meranga mapang ka nung junga meshisadangi ketdangsür temi senotsü meshidaki amshi ta Department dak kija aser lokti tentet temi tai tongloksüba ya tim masü. Anungji tangatetba shidak aliba nüburtetemi mangatetep bentetretetsü asoshi junga mejangjaba osang nüburtetemi mesangdongi ketdangsür den jembishinü tajung akatsü ayongzükter, ta sangdong ajangasa ashi.

## Dimapur DPDB senden thinener

**Dimapur, Aami/June 18 (TYO):** Dimapur indang District Planning and Development Board (DPDB) senden June 2023 atema DC Conference Hall nung June 19, 2023 anüngdang 11:00 ako nungi amentsü liasü, saka kota masüba tensa kar ajanga thinena June 28, 2023 nü

amentsü, ta Deputy Commissioner & Vice Chairman, DPDB, Dimapur, Sachin Jaiswal IAS ajanga sangdong ka nung ashi.

Züngsem ajaki anogo melenshiba meteta iba senden nung medema adentsü mepishir, ta sangdong ajangasa ashi.



June 18, 2023 nü Hyderabad nung Hyderabad Manipur Society nung züngsemtemi Manipur nung rara anema longkak aitdang tangokba noksa nung angur.

### Tawa Balasore nung train lendong nung asürtem 292 jungogo

**New Delhi, June 18 (Agencies):** Tawa Balasore nung train tsüktepba lendong nung asür ajak senteperbo 292 jungogo; Amongnüa West Bengal nungi arrshi küm 24 tebur ka hospital nung monga lia süogo, ta ketdangser kati metetdaksü.

June 2 nü train lendong nung Paltu Naskar yiruba sülen SCB Medical College & Hospital nung aliba central ICU nung monga lia Amongnü süogo.

Naskar ya West Bengal kübok South 24 Parganas district nungi lir.

June 2 nü train lendong nung pa kanga mejungi yiruba sülen nungi hospital nung monga liasü; pa temang tamajungba akümba sülen yashi (June 17) nungi pa nem ventilator support agüja liasü, ta East Coast

Railway ketdangser kati liasü. Train lendong nung yirurtem 205 bo SCB Medical College & Hospital-i anir oa liasü aser tang tashi nisung 45 bo treatment agidar.

"Nisung 12 ICU nung lir aser nisung anabo kanga mejungi lir," ta paisa metetdaksü.

Train lendong atalokba tesem nungjisa nisung 287 asü aser nisung pongu hospital nung temongdak mapang asü. Iba lendong nung nisung ajak senteper 1,208 yirua liasü.

June 2 aonung 7:00 ako meta Shalimar-Chennai Central Coromandel Express train-i khu abenba train ka anena lia tsükoktsü, aser iba lendong nungji Bengaluru-Howrah Super Fast Express train-a tetsüing longteta tugua tsükoka

Tang tashi tasü mang 81 bo maitsü mejangjai AIIMS, Bhubaneswar nung yua lir. Nisung 70-i DNA tendangtsü atema azü samples agütsüogo saka tang tashi report mangu.

Honibarnü AIIMS Bhubaneswar nung ketdangsertemi shidi ka ajanga Delhi nung aliba Central Forensic Science Laboratory dang nisung 15 indang DNA samples tendangba report bo agüja lidaktsüner, kechiyong parnok kinüngertemi iba report kanga yongyaa atadar, ta metetdaksü.

Indian Railways-ia sangdong ka ajanga iba lendong nung asür kinüngertem dang tasü mang maitsü jangjatsü atema azü samples agüjang, ta mepishia metetdaksüogo.

### India-i 2025 küm tashi nungbo TB samatsütsü atemzuka lir: PM Modi

**New Delhi, June 18 (Agencies):** India-i 2025 küm tashi nungbo tuberculosis (TB) tashidak samatsütsü atemzuka lir; iba tashidak anema raratsü atema 'Nikshay Mitra' nem lemzüktsüüogo, ta Amongnü Ato kilonser, Narendra Modi-i metetdaksü.

Ita shia agiba radio sentong 'Mann ki Baat' ajanga linük nüburtem den jembidang Ato kilonser Modi-i, "TB anema raratsü atema Pradhan Mantri TB Mukta Bharat Abhiyaan (Ni-kshay Mitra Initiative) mapatong inyaker, aser iba ya Ministry of Health & Family Welfare-i ketdangsäa inyaker," ta metetdaksü.

"India-i 2025 küm tashi nungbo TB samatsütsü nükjidong yua lir. TB anema raratsü atema Ni-kshay Mitra nem nungloktsüogo. Yimtsüngtem nnung nisung meyirjang aikati TB agi shirangertem anepalur. Iba ya atangji India dak aketba tashi lir. 2025 küm tashi nung TB samatsütsü atema lanurtemia shilem agir," ta pai metetdaksü.

Chhatrapati Shivaji Maharaj bilemteta Modi-i, "Chhatrapati Shivaji Maharaj tasü aitba den külemi pa yimsüsüba aser pa dak aketba

ketdangsäba sempettem nungi tangazüktsü aika lir. Chhatrapati Shivaji Maharaj-i inyakba mapatem, talisa tzü aser navy ketdangsäutetba ajanga tanü-a India nunger putitotsü merener," ta metetdaksü.

"Pai yangluba mitsatem putu aika sülen-a tang tashi tzüyim tiyong nung nokdaka dang lir," ta pai ashi.

Taküm International Day of Yoga omen metetdakja Modi-i, "Taküm International Day of Yoga atema omenji 'Yoga for Vasudhaiva Kutumbakam' lir. Iba ya ajanga Yoga tanela sayur, koba ajanga asenok longjemdaksür," ta metetdaksü.

"9buba International Day of Yoga anogomong nung tang mezüing UN Headquarters nung kü leniba nung yoga sentong agitsü," ta pai metetdaksü.

India nung disaster management jenjang kanga junga kümogo, ta shia Ato kilonseri Gujarat kübok Kutch nung alirtemi renemer tasü itta Cyclone Biparjoy tizüktetba atema tenüngsang agütsü.

"Cyclone Biparjoy ajanga Kutch nung timtem tulu agütsü, ajisüaka Kutch nung alirtemi tasü itta renemer iba yirpu tizüktet," ta paisa shisem.



June 18, 2023 nü Dehradun nung 'Shramdaan Program' kübok Uttarakhand Chief Minister, Pushkar Singh Dhami-i yimti merüktetba sentong nung shilem agiba noksa nung angur.

### UP aser Bihar na nung tali atsükba agi nisung 96 tashi süogo

**New Delhi, June 18 (Agencies):** Tawa anogo ishika Uttar Pradesh aser Bihar na nung tali atsükba agi nisung 96 tashi süogo; Uttar Pradesh nung asürtem ajakji Ballia district kija nungi lir aser Bihar nunga tatsük agi asür nisung 42 nungi 35 bo state yimtiba, Patna nungi lir.

Patna nung tali atsükba agi shiranger 200 shi hospital nung mongdar aser Ballia nunga tali atsükba agi shiranger 300 shi hospital nung mongdar.

"Ketdangertemi ashiba agi, tali atsükba agi shiranga hospital nung amongertemji teimbaka

arrshi küm 60 ser temapurtem lir; parnok kar temang metaa shiranger, kar saaktsür, kar tebok aoer aser kar tangu sashiba tsütsü timtem lir aser kar temelungjang dak sendakba timtem lir," ta ketdangsertemi metetdaksü.

Patna nung shiranger 200 ji tebok oa saaktsür.

India Meteorological Department (IMD)-i, Uttar Pradesh aser Bihar densema linüktem aika nung tali tatsük kümogo aser maneni taruba anogo asem shi tatsük asütsü, ta metetdaksü.

Amongnü IMD-i, taruba

anogo asemnü tashi Vidarbha, Chhattisgarh, Jharkhand, Odisha aser Telangana nung kanga tatsük asütsü, ta metetdaksü.

IMD-isa, anogo ananü lirbo Coastal Andhra Pradesh & Yanam, Bihar, Gangetic West Bengal, East Madhya Pradesh aser East Uttar Pradesh nung tatsük süngjemtsü, ta metetdaksü.

Tesüiba küm 10 tsüingda Bihar nung anogo aika tali atsükba ya tang talangtiba lir, Honibarnü Bihar kübok district 11 nungbo temperature 44 Degree Celsius den teimba liasü.

### PM-i Manipur tensa azüoktsü melen US semdang: Uddhav Thackeray

**Mumbai, Aami/June 18 (Agencies):** Shiv Sena (UBT) Tir, Uddhav Thackeray-i Ato kilonser, Narendra Modi aija, tanga rara adoka aliba Manipur state nung tensa azüoktsü melen US semdangtsü sentong aliba atema aitsü.

Amongnü state-level convention nung jembidang Thackeray-i BJP-i aniba Centre sorkar dang Manipur tensa atema kanga tongtibang säa inyaktsüla, ta ayongzük.

Party nung inyakertem den jembidang Thackeray-i Manipur nung tensa tamajungba akümba lemsatepba den külemi iba tebilemstü bentettsü atema linük longjemer inyaktsü kanga rongdak nüngdaka kümogo, ta ashi.

Ato kilonseri June 20 nungi June 25 tashi nung US aser

Egypt semdangtsü aliba aija Thackeray-i, Manipur tensa azüoktsüji tongtibangba südaktsüsüla, ta ashi.

"Linük tesem ka (Manipur) nung rara lir, saka Modi-i iba tesem jagi maoba dang masü iba tebilemstü bentettsü atema kecha meinyak, ajisüaka pa America-i aoer," ta Thackeray-i ashi.

Manipur nung yimjung atema ken o jembitsü nüngdak, ta shia pai BJP-i aniba sorkar dang, tanga rara anentsü atema mera agia inyaktsüla, ta ashi.

Thackeray-isa, Kashmir nung Arlla 370 agienba sülen kechiba yangji elections ayongzuka magir, ta asüngdangba den külemi Kashmir nung Hindu nunger atema tebilemstü akaba lemsatep.



June 18, 2023 nü Fathers' Day anogomong nung Nadia nung aliba lungro yangluba tesem ka nung aayanger kati par tanur ana anir senzuba noksa nung angur.



## TIR YIMYIM YIMOBILEM (EDITORIAL)

DIMAPUR TENTONÜ, AAMI (JUNE) 19, 2023

### English agidang masü !

**E**ngland aser America nungertem dang nungibo English oshi ya asenok asoshisa tongtibangba, kechiyong yabo tetsü oshi dang masü alima oshi, anungji ajaklen nungdak ataloka jembitetter. Iba jagi asenoki balaka English oshi jembitsüba nung kanga temulung agütsür. Ano, Nagaland nung balaka asenok ya English nungertemi shisa tenük lapokja nüchi kümtsü, anungji asenok asoshi English oshi jembitetba ya tangar temeteter mesüka nüchi akümba tamaitüsü lir. Aji dang masü saka tia junger majung ka Naga nungertem ajaki jembiba Naga nung oshi ka maka, anungji Hindi, Assamese aser Nagamese dang nungibo asenok asoshi English angazükang temelaba aser tajungba bilemer. Iba jagi tanga bendanglen dang masü saka Nagaland nung yimten aser lokti oshiji English kümogo. Iba yagi Aokin dang masü saka Naga kintem aika pei tetsü oshi jembitsübo menüngdak amai bilemer, anungji angazüksü aser jembitsü mejangrar. Aji oda, pei tetsü oshi yabo mashi memetetertemi jembiba oshi amai bilemer, anungji pei tetsü oshi jembitsü nümamedangtetba purtem asenok rongnunga aika lir. Ajisuaka, English dang jembia jembia degree tajungba ngua züngtetertem aser zünger nübortem tenzüksü asoshi ketdangsüba mapa tulu ngua tulu akümertem ajak asoshi, tesüsabo, asangsang nung kodang pei angazükba tashitemetet aser pei ajangzüketetba yimten tashi amshia nübortem madak yimsüsütsü mesüra nübortem tenzüksü mapang arudir, idangjibo nübor tenzükba wadang nung amshitsüba oshiji English masü pei tetsü oshi asütsü. Atangji, file nungbo English agi zülutsü saka tensa tia ajung majung ajak nung nübortem ajurua jembidangbo Englishji bendanger oshi kumadoktsü, anungji nübortem den yimten, lokti aser parnok kija-kibong nungdak English agi jembira, ashiko, mangateptepang adoktsü. Ibaji meteta, tanü asenok tsüraburtemi pei tanurtem dang pei tetsü oshi angazüksü aser jembitsü ajungshitsüla. Aji oda, tanü asen putu loktiliba nung English aser Hindi ya mapa inyaksü angazükba oshitem lir, saka kodang mapa inyak angazüker inyaksü tenzükdir, idangjibo mapa koka inyaksüba oshijibo pei tetsü oshi akümtsü. Nübortem tenzükba mapa, Civil Service, nung alirtem asoshi balaka government sentong aser telemtetbatem nübortem nem angatetdaksütsübaaji kanga tongtibang, iba jagi pei district nung tenzükdan pei tetsü oshi agi nübortem den jembia tenzükba ajanga khen nung nübortem kanga ajangzükdaksütsü aser nübortemia saputsü saka bendanger oshi jembiba agibo, ashiko, khenkhenbo nübortem rongnung matoktsüla ka nunga rongrongshishiang tulu adokdaksütsü. Aji oda, kong südirsuaka pei tetsü oshiji nübortem rongnung lisopurtem oshi akümer, anungji kasa tetsü oshi jembirtemji kinunger adianu kumadoker. Joko, tanübo asenoka tazung aser temetetba nung tangar menepa akümer asünungji, assembly election nunga bendanglen jenjang tulu ngua züngtetba purtemang tokteptsü, ajisuaka item tashitemetetertem jagi pei constituency nung pei tetsü oshi agi pei nübortem den mejembitetra pa mesüra laji bendanger ama kumadoktsü. Aji oda, item pei tetsü oshi mashiba tashitemetetertem jagi pei tetsür lu aser lar kibong tia aser nungdak memetettsü. Atangji, shitakba pei nübortem meima parnok den lia parnok tenzüksü asoshiho pei tetsü oshi dang masü saka pei tetsü osü dena ashitsüla. Pei lima, pei yimtsüng aser pei nübortem nungi pilar akümüli piyong bendanglen lia jajatsüba purtem asoshia pei tetsü oshi jembia ashitsüba yabo kanga nungdaker, kechiyong bendang lima nung bendanger rongnung asen tenüngji tsüraburtemi jatsüba tenüng ya masü saka pei tetsü oshi asütsü. Aji oda, asen alidak asen den lisemertem nem asen tetsü oshi ojang ka ana angazükdaksütsüba parnok asoshia parnok taküm nung mamadoktettsüba rongsen kumadoker. Tanü lima yabo jangratemtsüka, bendanger oshi English aser Hindi ama yabo kaketrejui maodang angazükadoker, anungji asenok pei kidang pei tsürabur aser tanurtem külemi alidang mamadoki angazüksüba oshiji pei tetsü oshi ya dang akümer. Nisung shia asoshi pei tetsü oshiji teyarir tetsü tajung ka ama kumadoktsü.

## OLEMSABANG

### NISUNGER SHISATSÜ TANGATETBA ASER JAKLA-YIMYA TAPU BALALA

~ L. Kika Pongener.

*(Yashi adok nungi...)*

Asenoki tongmelang agi nisung rongnung shisatsü tangatetba aser jakla-yimya telemsaji kar bushidangdi...

- (1) Ajak dang tajungtiba telok ka lir aser ibaji...Lennitsü, acha-ayangtsü aser ketdangsutsü sempet (Leadership quality) keta aliba nisung asütsü. Koba yimden aser koba lokti nung yamala nisungtemji lennir shilem agi atadir, iba telokji kanga renloka tejakleni aotsü. Ajisuaka, item nisungtem atema kanga tekümdangtsü kaji, Ni ser shiba...??? Ni tang metet...!!! Ni tang shitak...!!! Shingaia ni metongshitsütsü makok...!!! Yamala shisatsüji lennir shinga daka malitsüla.
- (2) Tanabuba telok ka...Lennitsü, acha-ayangtsü aser ketdangsutsü sempetbo maket, saka pai/lai tang ajak meteta ali amai lokti ajunga nung teka yia amuoka kibur asütsü raktepba shilo ka lir. Yamala nisungji sorkar, yimden, arogo aser loktiliba nung lennirsuba tongti shilem agi atadaksüra, iba telokjibo kangasa tia maka aser takoksa asütsü.
- (3) Tasembuba telok ka...Lennisuba, acha-ayangtsü aser ketdangsutsü sempet kanga tulukabo mali, saka bendanga agüja, nendak-nentaka inyakba aser tangar nungi angazüksü merangba shilo ka lir. Yamala nisung nemji lokti lennitsü shilem agi atadaksüra, iba telokjibo kangasa tia taka asütsü, kechiyong yamala nisung jagi telok tsüngken tsübua, tangar nungi shisatsü agia, ajemalua tila kümer loktiji anitsü.
- (4) Pezübuba telok ka...Lennitsü, acha-ayangtsü aser ketdangsutsü sempetbo meshi-meshia maket, saka lenla ajak arok-aroka shisadangba, inyakyim ajak rajema angatetba telok ka lir... Parnokji kipok nung shisa-len sayur tajung aser arangshidak longzük tajung asütsü. Yamala nisung dena aliba telokji kanga tia taka asütsü, kechiaser lokti nung ken o tasak arudang, lennirtem amman milen züksep ama chitaker teimla mekai alidang, parnok shisatsü tajung jagi teimla kaa kümdaksütsü aser lenmang sayutsü.
- (5) Pongububa telok ka...Lennitsü, acha-ayangtsü aser ketdangtsü sempetbo maket, saka rongsen akar/taka-taiter shilo ka lir, yamala nisung alidak loktiji kecha tebilemstsü maka, lokti maka-mait ajunga nung parnoki teka sala-a tenlaba agi tamakoktsü mapa ajak takoktsü kümer loktiji anir aor. (6) Terokbuba telok ka...Tangar küpok tenya ashi anga-a anidaktetba, tangar tenzüksü aser lokti tenzüksü sempet aketba nisung kar lir...Iba amala pei sasa pei jenjang angatetba nisung alidak loktiji kecha tebilemstsü maka, tenya-tenpong, lemya-lemko, osangtsüsang tongtepratep, anganuba aser sorochiok mapa ajak tiptema inyaker. (7) Tenetbuba nung kangasa tongtipang telok ka...Yimtsüng/Jila ajak nung mezüngbur (Pioneers) kar lir...Iba shiloji nubur ajungai akümtsür aser parnok lennirsuba nung tashi anga-a anidaker. Aji oda, iba shilo dakji alima aser nubur meimba shisatsü tajung lira, iba yimtsüng/jila aser loktiji tia taka asütsü, saka iba shilo dakji alima aser nubur meimba shisatsü tajung keta melira, iba yimtsüng/jila aser iba loktiji kangasa takoksa tulu asütsü. Koba yimtsüng/jila nung mezüngburtem dak alima aser nubur meimba shisatsü keta lidir, iba yimtsüng/jila nung aliba yimden, arogo aser lokti-tentet ajungaji renloka tejakleni aotsü aser yimjung nung sunepa alitsü. Aji oda, koba yimtsüng, koba jila nung mezüngpurtem dak alima aser nubur meimba shisatsü agi anungakonga lidir, iba yimtsüng aser jila nung aliba yimden, arogo aser lokti-tentet ajungaji renloka tejakleni maotsü aser yimjung nung sunepa malitsü. Tesasatsüka, yimtsüng aser jila kar nungbo, mezüngburtem jagi loktiliba ajungaji parnok mulungba nung ayutsü aser anitsü merangdang, aser pei ajungtsü asa-a tashi amshia tashiyim inyakba ajanga, iba yimtsüng aser jila nung aliba yimden, arogo, loktiliba aser nuburtem renloka tejakleni moi rajang kümdaksüba-a tesem kar nungbo angutsü. Anungji akokba tashi koba yimtsüng aser jila nung sudir suaka, mezüngburtem jagi, pei lima aser pei nuburtem dang meima yimjung nung ayutsü aser anitsü merangtsüla. Atangji, alima nung, nisung rongnung shisatsü tangatetba aser jakla-yimya tapu balala aika lir, item ajak jagi pei pei akokba shilem tajung agia, pei lima aser loktilibaji yimjung nung sunepa ayutsü aser anitsü merangra, asen aliba linukji kanga renloka tejakleni aotsü, aser asen aliba linuk nungji kodanga mepetmesu aser telemsa malitsü. Aji oda, nisung shiai pei sempet angateta alima aser nubur meima shilem tajung agira, asen lima renloka tejakleni aotsü aser alimai metetba aser züngshiba linuk/yimtsüng/jila ka asütsü.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**



ABAM Impur aser Dimapur Ao Baptist Arogo ajanga Ao Senden Baptist Arogo nung June 15 nungi June 18 tashi Fathers' School takok ngua agiba sülen tangokba noksa nung angur.

### Oregon nung asentenshi sentong ka nung nisung 600-i Khrista agizük

**June 18, 2023:** United States kübok Oregon nung sayutsünger Andrew Palau aser pa kinüngtsü, Wendy nati ayongzükba CityFest asentenshi sentong ka nung nisung 600 dak temai Yisu Khrista agizükogo. 'Cityfest' asentenshi sentongji Klamath Falls, Oregon nung agi. Iba sentong ya Arogo 53-i yarisema ayongzükba liasü. Andrew Palau-i, "Tamangertem den külemi longjemer lokti nung Yisu tenüng ajungkettsüba ajanga anguba tepelaji kecha den-a medemdangtsü makok. Alima

tesem ajaklen nisungtemi osangtajung agizükba onoki angur aser yangi Klamath Falls nunga yamaji," ta metetdaksü. Iba outreach sentong küboksa chiyungba sentong, tepuokdak semdangba, lanurtem ayongdenba aser kenten sentongtem agir. CityFest sentong nung award angur kentenertem-Newsboys, Ryan Stevenson aser Marisol Park nungeri shilem agia liasü. CityFest ya sentong ka dang masü saka iba ya nüburtem ajungmesoba aser tamangertem nem tashi

agütsüba den külemi longjemer asen region nung tenzükba mapa inyakba lir, ta pai lemsatop. Klamath CityFest Co-Chair, Doug Kirby-i, "Arogo 53 longjembaji tesüngmangtsüka liasü. Arogo longjemba tashiji aikati meteta aküm. Asentenshi tenzükogo aser ibaji ajanga tarutsü putu atema Greater Klamath Region nung temelenshi adokdaksür. CityFest sentong ya akumli nung khen dang ajangshiba sentong lir; iba ya ajanga asenok ajak Khrista mesüka akümtsü ajungmesor," ta metetdaksü.

### Nigeria nung Muslim nungeri senotsü agi yaria Khristan 16 chiok

**June 18, 2023:** Nigeria kübok Kaduna state nung Khristan aika pua ita ka shi mechiokba sülen tesüsa Muslim nunger teyari ajanga parnok ajak chiokogo. Prangpong amer telok kati Khristan 16 chioktsü atema sen akhang, ajioda Muslim nungeritemi senotsü agi yarisemba ajanga Khristantem ajak chiokogo. Madala, Chikun Local Government Area nung aliba Bege Baptist Church nung züngsemtemji June 4 nü chiokogo, ta London nung amenoka aliba Christian Solidarity Worldwide (CSW)-i sangdong ka ajanga metetdaksü. Taküm May 7 nü Amongnü tekülem sentong agiba mapang nung prangpong amer telok kati Khristan 40 puer ao. Parnok teimbaka jena otet, ajisüaka Khristan 16 bo mejenteti ita ka jungnüa parnok ket nung liasü, ta CSW-i metetdaksü. Christian Association of Nigeria Kaduna chapter nung chairman, Rev. John Joseph Hayab-i, yangji aliba Muslim nungeritemi senotsü tenla bendena agütsü aser nisung apur teloki akhangba ama motorcycle-a ka alia agütsü, ta metetdaksü. "Tang parnok 16 prongla

kidangi meyipa aruba atema pelar. Muslim nungeritemi senotsü teyari agütsüba atema onoki parnok danga pelar," ta Hayab-i metetdaksü. Rev. Hayab-isa Madala nung Muslim nungeritemi amalitepa yaritepba ama Kaduna state tesem ajaklen iba tatishitsü tajung benshitsüla, ta ayongzük. "Muslim nungeritemi timtemertem yaritsü atema shisaliok menüngdaker, ta tatishitsü tajung sayuogo. Nigeria tesem ajaklen tetsübu malitsü atema ajaki adianu ama alitsüla," ta Hayab-isa ayongzük. CSW tentetsang, Mervyn Thomas-ia Muslim nunger dang pelaba lemsatop, aser iba ya longjemba aser amalitepa inyakba putu ka tenzük asütsü imlar, ta metetdaksü. Thomas-i, "Onoki Nigeria nung ketdangsertem dang tamangba yimsü nung ajemdaker telemsa adokdaksürtem anema inyaktsü mepishir aser tashimaitba nüburtem kümzüktsü mepishir," ta metetdaksü. State Department indang international religious freedom report ajanga ashiba agi, 2022 küm nunga Nigeria nung rara ajanga Khristantem aser Muslim nunger naprongla

takoksa nguogo, ta metetdaksü. NGO Armed Conflict Location & Event Data Project (ACLED) indang report densema telok balala nungi osang bendena international religious freedom report ya renema liasü. ACLED report ajanga ashiba agi, 2022 küm Nigeria nung civilian 3,953 asü aser 2021 küm civilian 3,699 asü. State department report ajanga, "Nigeria nung, talisa north tsütsü rara manenba ajanga Muslim aser Khristantem naprongla takoksa ngua nisung aika süogo. Tesem ajaklen ozüng alema inyakba telok balalai nisung apuba aser auyaba kanga bulua kümogo," ta metetdaksü. International Christian organization- Open Doors-i, kiralongrar teloktem, Fulani telok aser ozüng alema inyaker telok balalai nisung jenti tepsetogo, talisa Khristantem takoksa tuluba angur, ta metetdaksü. Tesüba küm aika Khristan temeden atema inyakertem aser melungtet telok balalai Nigeria nung Khristantem aika tepsetba osang sangdonga arur, saka Nigeria sorkari ozüng alema inyakba teloktem nokdangtsü atema kecha meinyaker.

## ANOGO ABEN TSÜNGREM DEN

### Yihova Tezüngzükba T.Ken 144:1-8

Kechiba takoksang Tsüngremi asenok dak temulung agütsür ? Pa taochi agizüktsüsa asenok shirnok ? Dawidi iba tasüngdangba tekong 3 nung asüngdang. "Kibuba nai meimchir metettsüsa kechi lir ? Mesüra nai nisung chir züngshitsüsa kechi lir ?" Tsüngremi asenok züngshitsüsa asenok kechi lir ? Asenok teyakyak asü ? Shiruru karbo asenok dang nungi tashi taitba lir. Asenok temeshi asü ? Masü, asenoki Tsüngrem anema temenen mena. Asenok tamang katetba lir asü ? Aiben asenoki Pa dang tashi manger. Meimchir tangatetba tsütsü nungi Tsüngremi asenok menungratsüsa asenok dak kecha maket. "Nisungji tangula ka dang mesüka lir; Pa anogotemji süia aoba akhüm ka mesüka lir" (t.4). Teti takümji mokozü alungba mesüka lir. Parnok angur idangjisa parnok oadoker. Kechiba Tsüngremi asenok dang temulung agütsür? Kechiaser Pa taochi aser yimli bilem agi asenok dang meimer. Idaki Dawidi Tsüngrem amshiba tetezü Yihova Tsüngrem, taochi tezüngzükba akaba Tsüngrem ta amshiba lir. Pai asenok dang tenangzükbatem nangzük aser parnoki pa dak amangtsü akok. Dawidi Pa "Kü mulung aser kü mitsa, kü tashi tait lungki aser kü kümzüttsüba, kü jong aser Pa dak ni jenokdak bushir" (t.2) ta rasaa ashi. Ibai asenok asoshi rasaa ashitsü kanga tarok miim o lir, saka metettsü asoshi asenok asoshi kanga tarok masü. Kechiba Tsüngremi asenok dang temulung agütsür asenoki mangatettsü akok, saka Par chir kilir ka asütsü aru ta asenoki metet. Pa kangki nung asü, asenok asoshi tenla agütsü, aser tang pa kotak nung lir, asenok asoshi mepishitsür. Tsüngremi asenok dak temulung agütsür kechiaser Pai asenok meimer aser asenok taküm ajanga pa sentsüwangshiner. Pa den jajaang aser ne taküm Pa sentsüwangshidakjang.

### Belagavi nung Khristantemi Manipur nung Khristantem amakba aitsü



June 16, 2023 nü Belagavi (Karnataka) nung Khristan telok kati linük Tir aser Ato kilonser na dangi züluba temepishiba shidi ka Additional Deputy Commissioner, K T Shanthala ket nung agütsüdang tangokba noksa nung angur.

**Bengaluru, June 18** Tawa Manipur nung (Agencies): Hokolbarnü (June 16, 2023) Belagavi (Karnataka) nung Khristantemi Manipur nung Khristantem amakba aitsüogo. Parnokisa temepishiba shidi ka ajanga linük Tir aser Ato kilonser na dang Manipur nung rara ajanga takoksa angurtem nem ochi temeden agütsütsüla, ta takhangba agütsü. Belagavi nung Khristantemisa Wrestling Federation of India (WFI) Tir anema longkak aiter tetsür wrestlers anema tashiyim amshirtem nem temerenshi agütsütsüla, ta takhangba agütsü. Tawa Manipur nung meimchir temeden balala alema inyakba, nisung tepsetba aser kiojen raksatsüba tatalokbatem osang angashia Khristantem jashir, ta shidi nungji shia lir. Parnoki temepishiba shidiji Additional Deputy Commissioner, K T Shanthala nem agütsü. Iba shidi nung sign süa alirtemji Catholic Religious of India aser Catholic Association nungi züngsemtem- Tir Clara Fernandes, Fr Johnny, Fr Vijay Mendith, Sr Nathalia, Belgaum Diocese PRO Louis Rodrigues, Manager of St Joseph Convent Sr Natalia, Sr Rose Abraham aser tangartem liasü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Rarenben**

(n) temoatsü aruba (get blessing)

\* Tang ya asenek atema **rarenben** mapang lir.

**Rarenkar**

(n) temoatsü aketba nisung (blessed person)

\* Moabaer kibongbo tsürabur mapang nungi **rarenkar** liasü.

**OLONG PAITEP # 6549**

1		2		3		4	5			
				6						7
		8								
9				10		11				
			12						13	
						14				
16						17				

**TIPILEN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S \_\_\_ i - (3)
- 9. Nisung telesa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatemangtiba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzuma nung senzuba - (5)



**OLONG PAITEP # 6547 TELANGZÜBA**

**TIPILEN :**

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

**LANGTSÜNGLEN :**

- 2. Inyaktet, 3. Kija, 4. Ano,
- 6. Korang, 8. Joko, 9. Bilemetet,
- 10. Sentep, 11. Süks,
- 15. Anüm, 16. Enü.



**Agüja aliba  
noksa nung  
meputepi  
aliba 6  
bushiang**

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**



1. Tenüng : .....

2. Tasoba anogo: .....

3. Küm : ..... 4. Class : .....

5. School : .....

6. Talidak : .....

7. Salem osang : .....

**Dimapur nung World Music Day 2023 amongtsü**



**Dimapur, June 18, 2023** TaFMA teloktem yaritepa (TYO): Task Force for Music & Arts (TaFMA) den yaritepa Dimapur nung World Music Day ayongzüka amongtsü. Iba sentong ya Event Partner-Sky Entertainment, Love Easts events, gear partner Crescendo events, light partner Shiu lights, artistes partner Soloist work station, Infinity Inc, sound partner BN sound, print partner MI Printers, Dimapur TaFMA district partner, Niuland

21, 2023 nü Green Park, 5th Mile nung amongtsü. Nikongdang 4:00 ako sülen sentong agidaki nisungtem angati aيتدaktsütsü aser nikongdang 5:00 ako nungi sentong tenzüksü. Iba mapang Green Park, 5th Mile telung nung yi amshiba noktangtsü aser tanur-tain ajak arua shilem agitettsü. Iba sentong nung Nagaland kübok tesem balala nungi kentenerntemi shilem agitsü.

World Music Day nung artists, musicians aser keten jangrartemi nem tetushi agütsütsü maongka angur. Taküm World Music Day nung Dimapur nungi music industry-i sentong balala agitsü renema lir. World Music Day ajanga sobaliba lemsateptsü aser alima tesem balala indang kenten ajungkettsü atema alizüng lir. World Music Day ya June

**Kaziranga National Park nung shirurutem kümzüksü renema lir**

**Guwahati, June 18, 2023** (Agencies): Tzümetzüng agi kongshiba ajanga Kaziranga National Park and Tiger Reserve (KNPTR) ketdang sürtemi rescue operation atema forest staff ajak renemshia lir. Forest department-i park nung timtem kar danga ajurura yariteptsü renema lir ta Kaziranga National Park DFO, Ramesh Kumar Gogoi-i ashi. "KNP nung mashii mapang ka nung tzümetzüng timtem ajurutsü akok aser iba atema

ketdang sürtemi renema lir" ta DFO Gogoi-isa ashi. Onoki hand boats 150, motor boats 10 aser floating camps renema lir, ta paisa shisem. Assam state forest department-i tzümetzüng nungi shirurutem kümzüksü atema highlands 40 yangluogo. National park nung shirurutemi tzümetzüng mapang highlands nung jenoktettsü aser national highway nung atsü yoktsü aser shiruru tsüksetba nungi kümzüksü atema mapang shia

time cards agütsütsü, ta DFO Gogoi-isa metetdaksü. Kümshia tzüngluruwa mapang Kaziranga park ajunga tzü agi mobanger aser iba ajanga shirurutemi anameta Karbi Anglong hills-i aoer. KNP nung additional forest staff mapa lemsateptsü atema bangdakpurtem dangi shidi zülüogo, ta Gogoi-isa ashi. Ali tasazük 1044 sq nung aliba Kaziranga National Park ya Unesco world heritage site ka lir aser kümshia tzümetzüng timtem ajurur.

**Indian Army-i Imphal Valley nung flag march agi**



**Imphal, June 18, 2023** (Agencies): Indian Army-i June 17, 2023 nü Imphal Valley nung flag march agi aser ketdang sürtemi Deobarnü metetdaksüogo. June 18 anepdang 5:00 ako nungi nikongdang 5:00 ako tashi curfew salatsür ta

ketdang sürtemi ashi. Public-i chiyungtsü aser mozütem lijaliyongtsü atema curfew mapang salatsür, ta Imphal West indang District Magistrate-i ashi. May 3 nü Manipur nung Kuki aser Meitei nungger tsüngda mepetmesü adokba sülen section 144 kübok curfew agüja liasü.

Imphal West District kübok Meitei Langol dak alaka tanungba tesem ajaklen curfew mapang salatsür ta District Magistrate-i metetdaksü. Ajisüaka iba tenokdangba kübok Health, Electricity, PHED, Municipality, Press & Electronic Media aser Courts madener, ta paisa metetdaksü.

# Antony Blinken aser China foreign minister Qin Gang ajurutep

**Beijing, Aami/June 18 (Agencies):** United States Secretary of State Antony Blinken-i China indang Foreign Minister Qin Gang den Beijing nung ajurutepogo aser ibai küm pongu jungnüa nung US ketdangsür kati China semdangba mezüngbuba alitsü.

Linük ana tsüngta tesendaktep mejungi lia ano February ita US nung spy balloon südi temolung melemte aliba balloon February ita nguteter Blinken-i kasa ita China semdangtsü sentong aliba thir sülen ananü atema pa Deobarnü Beijing tonga lir.

Alima nung economy tsütsü tashi tulutiba linük ana ya shishilempaba nungi technology aser regional security densema ken o balala nung mangatetep adoka lir, saka linük anaprongi osangtsüsang agitepba nung terenlok akatsü imlaba lemsatepa lir.

Blinken ya China-i aoba mapang US Tir Joe Biden-i balloon otsü ya nembangtsü meranga "Leniri ibai kong ali aser yangji kechi ali aser kechi atalokar memeteti alitsü amai bilemer. Iba nükjidong dang nungi maksü ang tali amai bilemer," ta Biden-i osangbener dang Honibarnü shia liasü.

Bali nung taoba küm November ita Group of 20 (G20) summit mapang China Tir Xi Jinping den ajurutepa senden talangka amenba sülen Biden-i ano Jinping den ajuruteptsü imlar, ta shia liasü.

Taoba küm Biden aser Jinping na ajurutepdang Blinken-i Beijing semdangtsü ya molungtepa liasü.

Lenir ana ya September ita New Delhi nung G20 mapang ajuruteptsü amai lir aser November ita San Francisco nung Asia-Pacific Economic Cooperation (APEC) grouping nungi lenirtem seden amendang Xi jaoka lir.

Blinken ya China ketdangsürtem den ajuruteptsü imlar aser Diaoyutai gardens nung aliba state guesthouse nung banquet ka nung adentsü.

Blinken aser Qing Gang tsüngta phone ajanga jembidang linük ana tsüngta mangatetep aliba indang jembia liasü.

Beijing aser Washington tsüngta tesendaktep tamajungba kuma lir aser künü linük ana ya Taiwan mechi raratsü akok ta takzür, koba China-i par meyong ama jembir.

Ano shishilempaba, US-i China indang semiconductor industry soita ayuba aser Beijing

indang human rights inyakyim amala ken o nung linük ana ya mangatetep nung lir.

Blinken ya Beijing-i maodang Hokulbarnü osangbener senden ka nung jembidang, pa aini aoba ya nükjidong asem lir aser itemji mangatetep adoka aliba ketdangsütsü asoshi mechanisms amenoktsü, US aser tembar linüktem tejangraba tali renlokshitsü aser iba dak sendakba nung indang indanga jembiteptsü aser tesendaktep atema lenmangtem bushitsü, ta shia liasü.

US-i par tembar linüktem mesendoker aser pa Pacific alema ghonda 20 jajadang Blinken-i telephone ajanga Japan aser South Korea foreign minister tem den jembia liasü.

Biden indang national security adviser Jake Sullivan kasa mapang Japan, South Korea aser Philippines linük ketdangsür den senden amentsü Tokyo nung lir.

Tawa US-i southern Japan aser northern Philippines nung sepaitem yoktsü asoshi tezüngzüktep ka yanglu, koba Taiwan anasa lir.

2018 küm Mike Pompeo aoba sülenbo US leniri Beijing semdangbabo Blinken ya mezüngbuba alitsü.

# ASÜR MOKOKTOSHI (CHUCHUYIMLANG) Sür Küm Ka Ajungba Menungra Bilemteter



19.06.2022


19.06.2023

Tanü nai onok toktsür or küm ka süitemogo. Metongteter, metangshiteter, saka ne temeim ajemalu, anebalu aser menürem jakden teti onok mulungjang nung alir.

Kenü anogo Kibuba kidang ajuruteptsü yongyaseta atar.

*Temeim kinungtsü aser kinungertem.*

# Biden-i 2024 election atema mezüngbuba nübuyim sentong agi



**Philadelphia, Aami/June 18**

**(Agencies):** United States Tir Joe Biden-i 2024 tir election nung maneni tokteptsü April ita sangdonger mezüngbuba nübuyim sentong Philadelphia nung ayongzüka liasü.

Honibarnü iba sentong ya American Federation of Labor and Congress of Industrial Organizations (AFL-CIO) ajanga ayongzüka liasü, kong mapa inyaker million 12.5 dang timba tenung nung union 60 lir. Parnoki Biden aser pa indang running mate Vice President Kamala Harris busemstsü sangdong, koba US tir election nung yaritsü sangdongba rongnung tekeratiba alitsü.

"Ni tir atema toktepdang ni nenok den alitsü ta shiogo aser yamaji nenok den lir. Aser nenoka kü den liasü," ta union züngsem 2,000 shi aliba sentong nung Biden-i ashi.

Kera yaritsü sangdongba ajanga election nung tetsüngta tulu alitsü, ta pai ashi.

Convention hall telung nung aliba union worker noklang aikati "Let's go, Joe!" ta ayimtena liasü aser Biden marudang nungi ola agüja campaign signs songa liasü.

Union züngsemtem ya carpenters nungi tenzüka airport service nung inyaker, entertainers nungi heavy service equipment engineers tem dena lir aser sapang nungi Biden tenung sanga liasü - kari Spanish oshi nung jembia aser item o English oshi agi meyipzükja liasü.

Democratic telok nungi tiri mapang shia union sentong nung adenba ajanga pa tanaben kümsük asoshi labour

movement ya kanga tongtipang ama pai bilemba sayur. Pa tanaben tir asoshi tokteptsü sangdongli Wasington nung labour conference ka nunga pa dena liasü.

Labour lenirtemi puti otsü nung union meimba tir tajungtibaji pa lir ta ashi, aser pa jakdang inyaksang Donald Trump-i mapa inyakerem kumzüka ayuba tashi maitba kumdaktsütsüsa ozüngtem yanglua alibatem pai melenshistsü, küm ter dak tema union züngem ajema akumba asendenshidaktsü aser linük nung union labour temi apu aser rongnendak tesemtem yangluba tezüpaba kumdaktsü.

Biden-i iba sentong nung ki o jen yanglutsü asoshi sen trillion \$1.2 teyari indang jembia liasü, koba Congress nung party ajaki molunga agizük.

Biden indang yimten yimsüsüba tsütsü iba yimti aser Pennsylvania ya tiyong südaktsür aru. 2020 nunga Philadelphia ya pa indang campaign headquarters liasü aser 2016 küm Donald Trump nem vote agütsür küm pezü sülen Democrats dangi meyipba state ishika rongnung iba state ya ka liasü.

Tang tashinung Biden indang nübuyim ya timba senotsü bendenba indang lir aser taküm second quarter tan ita atem dang sen aika bendener alitsü meranger. Hokulbarnü pai Greenwich, Connecticut nung private home ka nung sen bendena liasü aser ano yakta California, Maryland, Illinois aser New York yimtem nunga ayongzüktsü.

# Ukraine nung rara ya anentsüla: Ramaphosa

**Moscow, Aami/June 18 (Agencies):** South Africa tir Cyril Ramaphosa, shiba tang yimjung atema sensaksemstsü atema aoba Africa nunger lenirtem rongnung densema Russia nung oa lir, pai tir Vladimir Putin dang Ukraine nung rara ya anentsüla ta shiogo.

Ramaphosa-i, Africa nunger lenirtemi yimjung atema onük 10 bener aoba benoka liasü. Item onüktem ya kati ka dak tamang katettsü atema lir. Ukraine-i taoba hopta nungi asendenshir Russia nunger sepaitem amakba mapang ka nung tang lenirtemi yimjung atema jenjang agidar.

"Iba rara ya tatembang kabosa alitsüla. Mangatetep aliba ya sensaksem aser diplomatic lenmang balala ajanga bentettsüla," ta Ramaphosa-i Honibarnü St Petersburg kübok Konstantinovsky Palace nung ashi.

Paisa, delegate tem rongnung Africa nunger lenir tenet densema lir aser parnok osang tejangja ka bener aru, aji rara tembangdaktsütsü asoshi lir, ta ashi.

"Iba rara ajanga African continent aser alima nung linük balala dak kongshiogo," ta Ramaphosa-i ashi.

Putin-i okila jembiba mapang, parnok benokba onüktem aika osang tai agütsüba ajanga lir ta amangba lemsatepa liasü.

Pai ashiba agi, Russia-i taoba küm February ita arrtsü atena sepaitem meyokdangyongi Ukraine aser anüolen aliba

linüktemi iba mangatetep ya tenzükatoker liasü. Paisa, Russia-i Ukraine den sensaksemstsü atema kodanga nongnanga maliasü, koba Kyiv-i nokdanga aruogo, ta ashi.

Africa nunger lenirtem rongnung Egypt, Republic of the Congo, Senegal, Zambia, Uganda aser Comoros nungia lenirtem densema liasü. Item lenirtem yagi Hokulbarnü Ukraine tir Volodymyr Zelenskyy den Kyiv nung sensaksemogo.

Africa nunger lenirtem den sensaksemba sülen Ukraine nunger lenir yagi ashiba agi, Ukraine litsü nungi Moscow-i sepaitem aninba sülenang yimjung atema sensaksemstsü akoktsü.

"Onok Russia nunger ola na nungi aser na ajanga angatsü aru," ta Comoros tir Azali Assoumani-i Putin dang ashi, shiba tang African Union tekolakba lir. "Onoki Ukraine den sensak asemstsü atema na ajungshinür," ta pai ashi.

Ukraine nung mangatetep adokba dak sendakba nung Africa nung linüktem lemdanger lir. Linük kari Ukraine pusemer aser kar kecha telok dena madener mesüra Moscow pusemer.

Zelenskyy den senden amenba mapang Ukraine tir yagi Africa nunger lenirtem dang kati ka dak tamang kateptsü atema yimden yimsüsüba tsütsü tepuokertem chioktsü atema Putin nongshitsü atema mepeshia liasü.

Kasa mapang nung Africa

linüktemi telok ka den danga medeni liromedema sensaksemstsü benokba atema parnok nem Putin-i tenüsang agütsü.

"Onoki Africa nunger tembartemi Ukraine nung mepetmesü adoker aliba dak sendakba nung ajak liromedema inyaksangshitsü benokba pelashishia agizüker. Kati ka tejangraba akümtsübutepa aser ochi obendang asoshi sensaksemstsü atema benokba nung shilem agitsü onoki mulunga lir," ta Putin-i ashi.

Russia nunger lenir yagisa, Ukraine nunger jangotsütem Black Sea ajanga belentsü atema tenangzüktepba ka yangluba ajanga Africa tebilemstsü mebanteter, kechiyong iba ya shilem asem dang kanga sensaktia nung aliba linüktem atonger, ta ashi.

Putin-i ashiba agi, alima nung chiyongtsü agi tebilemstsü adokba ya Russia-i Ukraine amakba ajanga masü saka anüolen aliba linüktem inyakyim ajanga lir.

Kremlin otongdar Dmitry Peskov-i ashiba agi, Ukraine nungi jangotsütem Black Sea nung Russia-i amokbaner aliba tesemtem adena bener aotsü asoshi tenangzüktepba yanglushitsü atema kecha lenmang mali ama reprangteter.

"Tatembangbuba telemtetba kechi agitsü ajibo metakzütettsü, saka inyakyim apir iba tenangzüktepba yanglushitsü atema kecha lenmang mali ta ni shitettsü," ta Peskov-i Russian news outlet Izvestia dang ashi.

## Rankireddy aser Shetty nati Indonesia Open kokogo



**Aami/June 18, 2023**

**(Agencies):** India nungur tebur tarep Satwiksairaj Rankireddy aser Chirag Shetty nati Deobarnü Indonesia Open tebur tarep asaya final nung Malaysia nungur tarep Aaron Chia aser Wooi Yik Soh na koka iba asayamung title benogo.

India nungur tarep yagi iba asaya straight sets nung 21-17, 21-18 agi koka liasü. Iba asayamung nungsa Satwik aser Chirag nati top-seeded tarep Fajar Alfian aser Muhammad Rian Ardianto na straight games nung koka semifinal-i ai aser iba sülen semifinal asaya nung tenati Soth Korea nungur tarep M.H. Kang aser S.J. Seo na koka liasü.

"Iba asayamung atema onok kanga junga renemogo. Lokti-i onok pusemsü ta meteta liasü. Parnoki onok hopta tepeyong pusema aruogo. Hopta tepayong jangaradema asayaogo aser tanü kanga junga asayatetogo. Final nung point ka nungi ka ta dang asayanüa liasü aser iba ajanga takok tajung ngutetogo," ta asaya tembangba sülen Satwiksairaj-i ashi.

Asaya nung Satwiksairaj aser Chirag nati mezüngbuba game tom nungi asaya amokbanger asaya tenzük aser tena den asayar nem kecha maongka magütsü.

Tanabuba game nunga India nungur tarep yagi Malaysia nungur tarep ya sadem sadema masayadaksü aser point pezü agi tena tejakdang sür asaya-a asaya akok.

Tenai iba asaya akokba ya takok tulu ka liasü kechiyong Satwiksairaj aser Chirag nati 11 benbuba merandangba mapangang Aaron aser Soh na koktetogo.

Satwiksairaj aser Chirag nati Indonesia Open akokba ya otsü tasen ka lir, kechiyong India nungur tarep kati danga iba asayamung tang tashi nung koka maliasü. Kija asaya nungbo Saina Nehwal (2010, 2012) aser Kidambi Srikanth (2017) nati iba asayamung koker liasü.

Maneni tena ya India nungur tarep asayartem rongnung Super 1000 title ka abenba mezüngbuba tarep lir aser tena yasa S100, S300, S500, S750

aser S1000 events akokba India nungur tarep mezüngbuba lir.

BWF (Badminton World Federation) World Tour ya, World Tour Finals, Super 1000 pezü, Super 750 trok, Super 500 tenet, aser Super 300 11 ta kuma lemsar lir. Maneni asayamung nung category ka lir aser aji BWF Tour Super 100 level lir, aser iba asayamung nunga ranking points agütsür.

Asayamung ajak atema ranking point aser senpet balala agütsür. Super 1000 level akoker nem rangking point aser senpet timtiba agütsür.

Iba asayamung akokba densema India nungur tarep yagi tang tashi nung Commonwealth Games nung gold medal ka, Thomas Cup nung gold medal ka, World Championships nung bronze medal, Super 300 (Syed Modi), Super 500 (Thailand aser India Open), aser Super 750 (French Open) koka lir.

Maneni kasa asayamung tetsü kija asaya final nung China tsür Chen Yu Fei-i, Spain tsür Carolina Marin 21-18, 21-19 agi kokogo.

## Archery World Cup: Abhishek Verma-i gold medal angu



**New Delhi, Aami/June 18**

**(Agencies):** Tang Medellin, Colombia nugn asaya aliba archery World Cup Stage 3 nung Honibarnü Abhishek Verma-i tebur compound kija asaya final koka gold medal nguogo.

Arishi küm 33 tain asayar yagi final asaya nung USA nungur James Lutz 148-146 agi koka liasü.

Verma-i gold medal anguba densema India nungur asayartemi iba asayamung nung

gold medal ana nguogo.

Abhishek-i World Cup nung gold medal aiben nguogo aser pa World Cup mezüngbuba stage ana nung masayateti lir tang meyipa arur asayadar. Pai Netherlands nungur world No 1 aser top seed asayar Mike Schloesser 148-148 (10\*-10) agi shoot-off nung takok ngua semifinal-i ia liasü.

Iba sülen eighth-seeded asayar Verma-i semifinal nung Brazil nungur asayar Luccas Abreu madak takok ngua final

tongteta liasü.

Abhishek-i World Cup nung tang agi tasembenbuba gold medal nguogo aser 2021 küm Paris leg sülen tang mezüngbuba gold medal ka ngutetogo. Pai World Cup nung kija asaya nung mezüngbuba gold medal ya 2015 küm Wroclaw (Poland) nung ngua liasü. Paisa World Cup kija asaya nung silver ana aser bronze medal ka ta ngur lir.

India nungur asayartemi tang tashi nung gold ka aser bronze medal asem ngur liasü aser recurve mixed team-a bronze medal atema asayatsü lir anungji medal tally timba akümtsü imlar.

India team yagi Netherlands 6-0 agi koka semifinal-i ai ajisüaka Korea 5-3 agi makok. Parnok bronze medal atema Chinese Taipei den asayatsü.

## Visa mongutetba ajanga

### Pakistan team India-i maruteti lir

**Bengaluru, Aami/June 18**  
**(Agencies):** SAFF Football Championship atema Pakistan football team India arutsü liasü saka visa dak sendakba nung ken o kar mebetet aliba ajanga mapang shidak nung metongtet, ajisüaka parnok June 21 nü India den mezüngbuba asaya asayatsü alibabo menepa arutettsü.

Pakistan team ya Mauritius nung Four Nation Cup asayaba sülen Deobarnü Bengaluru tonga arutsü imla liasü. Ajisüaka team tang tashi Mauritius nung lir kechiyong parnok Deobar anepdang India aruba tayimtsü nung maruteti liasü.

Pakistan team ya June 21 nü aonung 7:30 ako nungi tenzüka Sree Kanteerava Stadium nung India den asayatsü lir, saka KSFA ketdangsurtemi ashiba agi kidanger team arutsü aliba dak sendakba nung kecha tetsükdaksü mali.

"India MHA (Ministry of Home Affairs) hopta tatemi shibanger aser parnok indang application Mauritius kübok Indian Embassy nung lir. Onoki AIFF (All India Football

Federation) den tongtepratepdar aser parnoki Embassy aser Pakistan Football Federation (PFF) den tongtepratepdar.

"Pakistan nungur asayartem indang visa application Hombarnü ajak bentettsü aser parnok Bengaluru Hombar aonung mesüra Mongolbar anepdangbo asaya metenzük tsünda tonga arutsü," ta KSFA ketdangsur kati PTI dang ashi.

Team, India-i arutsü atema NOC menoa magütsüba atema PFF-i linük Sports Board aitsüogo aser kasa mapang nung Board-i ashiba agi, Federation-i mapang shidak nung kuli kakettem mebenok.

Iba asayamung nung Pakistan team Group A nung Kuwait (June 24) aser Nepal (June 27) na dena asayatsü.

Ajisüaka parnok terenemshiba kangabo majung kechiyong Four Nation Cup nung Pakistan team-i asaya asemprongla makok aser ponglang nung tembang. Iba asayamung ya Djibouti-i koka liasü.

## Ajinkya Rahane Leicestershire nungi asayatsü



**New Delhi, Aami/June 18**

**(Agencies):** India nungur rongnungi middle-order batsman tejen Ajinkya Rahane, India team West Indies den July ita Test ana asayaba sülen English county club Leicestershire nungi division two nung asayatsü.

Rahane team nung mezüngoksemi arur linük team Australia den World Test Championship final asayaba mapang tanaben anioka asaya aser pai innings ana nung run 89 aser 46 yanglua liasü.

Rahane shibai January ita Leicestershire den tenangzüktepba ka yanglua liasü pa IPL tembangba sülen June nungi September tsünda first class games ti aser Royal London Cup (domestic 50 over competition) nung asayatsü liasü. Ajisüaka pa sentong melenshitsu aküm kechiyong pa Indian Test team nungi asayatsü atema shima liasü.

"Ajinkya, West Indies (July 24 nü tembangtsü) den Test

asaya ana nung asayaba sülen season nung tanungba asayatem atema England-i indang indanga oa Leicestershire den adentsü. Pa August ita Royal London Cup nung asayatsü aser September ita County games pezü nung asayatsü imlar," ta BCCI source kati PTI dang ashi.

Rahane tang agi tanabenbuba county cricket asayatsü. Pa 2019 küm 50 over World Cup team nung meshimba sülen Hampshire nungi asaya liasü.

Rahane, shibai WTC final nung run 89 yanglu pai Test asaya 83 nungi run 5000 yangluogo.

India nungur asayartem 50 over cricket dak rangloker asayaba mapang Rahane bo September ita tepeyong red-ball game asayaba nung mapang intoktsü aser iba sülen Indian domestic season atema India-i meyipa arutsü aser December ita South Africa nung oa asayatsü.

## **BILEMDANGANG**

**"Ola tashi agi adoka tangar nem na angashidaksütsü temerang."**